

Galicia destrona a Cataluña como líder na exportación madeireira

A industria forestal levanta o voo por vez primeira en cinco anos

mario beramendi Santiago / A Voz 31/3/2014

Por vez primeira en cinco anos, tras unha profunda crise, a industria madeireira galega levanta a cabeza. E non o fai empuxado polo mercado interno, moi contraído e co sector da construción baixo mínimos, senón grazas ao estranxeiro. Unha constante en todos os sectores económicos. A falta de coñecer os datos de facturación pechados do pasado ano, as 2.000 compañías que se dedican á madeira e ao moble en Galicia venderon durante o 2013 mercancía ao estranxeiro por un valor de 570,9 millóns de euros, un 5 % máis que no exercicio anterior, o que deixa á comunidade galega como a autonomía líder en exportacións. Galicia desbanca así a Cataluña, que ocupara o podio no 2012.

Os datos facilitados pola Confederación Española de Empresarios da Madeira (Confemadera) exclúen o valor das exportacións de pasta, grazas á fabricación de Ence, e que ascenderon o pasado ano a 194 millóns de euros, unha cifra moi similar á do exercicio anterior. Dos sete primeiros destinos das exportacións de madeira, seis deles pertencen á UE, e os principais países son Francia e Portugal, mercados cuxo comportamento ao longo do 2013 permitiu un repunte das vendas das empresas galegas, segundo revela o propio sector.

En Galicia, a industria de transformación da madeira factura máis de 1.600 millóns de euros anuais -coa compostelá Finsa á cabeza- e xera uns 70.000 postos de traballo: 20.000 directos e 50.000 indirectos. Tal e como revelan os propios informes do Instituto Galego de Estatística (IGE), o sector forestal constitúe unha das actividades estratéxicas da economía galega debido ao seu papel relevante no medio rural. En 52 concellos da comunidade, esta actividade representa ao 30 % das empresas asentadas. E nalgúns municipios do interior como Alfoz, Coles, Piñor, Pontedevea, Quintela de Leirado e Sarria, entre outros, a actividade forestal xera o 50 % do emprego.

O potencial do sector é o que levou á Xunta recentemente a lanzar a idea de rescatar algúns dos alicerces do Plan Estratéxico de Galicia, aprobado polo Parlamento galego en 1992, e que prevía un investimento anual equivalente ao 3 % do orzamento. Desde entón ata agora, o programa, que tiña unha vixencia ata o 2032 e cuxo obxectivo era pór en valor gran parte do monte infrautilizado, veuse incumprindo de forma sistemática. Ao longo dos últimos anos, Galicia gastou moitos máis recursos públicos en apagar o lume que en ordenar o bosque.

Os expertos alzan a voz

Iso tivo os seus custos en termos de fixación de poboación no medio rural, cada vez máis azoutado pola crise de rendibilidade das actividades tradicionais. O economista e expresidente da Xunta Fernando González Laxe recorda que un terzo do monte galego é improductivo, unha porcentaxe moi superior ao que se rexistra noutros países como é o caso de Finlandia (12 %), Austria (14 %), Suecia (18 %) ou Estados Unidos (20 %).

O monte, ademais, segue sendo un recurso moi valioso para moitas familias. Os últimos datos achegados por Medio Rural revelan que, durante o 2012, as vendas de madeira efectuadas por 54.200 propietarios forestais moveron 250 millóns de euros. Na comunidade galega hai agora uns 700.000 titulares de parcelas de monte, dos que só 100.000 cortan madeira con regularidade.

© Copyright LA VOZ DE GALICIA S.A.

Polígono de Sabón, Arteixo, A Coruña (España)

Inscrita no Rexistro Mercantil da Coruña no Tomo 2438 do Arquivo,

Sección Xeral, aos folios 91 e seguintes, folia C-2141. CIF: A-15000649.

- [Aviso legal](#)
- [Política de privacidade](#)
- [Política de Cookies](#)
- [Condicións xerais](#)

Webs do grupo

[Radiovoz](#)

[V Televisión](#)

[Voz Audiovisual](#)

[Sondaxe](#)

[CanalVoz](#)

[Voz Natura](#)

[Fundación](#)

[Programa Prensa-Escuela](#)

[Escola de medios](#)

[Camiño de Santiago](#)

[Outras webs](#)

[Lotería de nadal](#)

[Lotería do neno](#)

[Servizos](#)

[Bolsa](#)

[Hemeroteca web](#)

[Procura de necrolóxicas](#)

[Buscavoz](#)

[Puntos de venda do periódico](#)

[Subscrición á edición impresa](#)

[Oferplan Galicia](#)

[Ofertas na Coruña](#)

[Ofertas en Santiago](#)

[Ofertas en Pontevedra](#)

[Ofertas en Vigo](#)